

Nasib pesawah terus dibela

Dana RM3 bilion jayakan tanaman padi lima musim dua tahun bantu tingkat pendapatan

hifzuddin@bh.com.my

Alor Setar: Datuk Seri Anwar Ibrahim memberi jaminan kerajaan akan memastikan nasib pesawah terbela dengan meningkatkan pendapatan raereka melalui usaha menambah pengeluaran padi.

Menurut Perdana Menteri, beberapa projek rintis penanaman padi lima musim dalam dua tahun sudah dimulakan, antaranya oleh Lembaga Kemajuan Pertanian Muda (MADA) dan Lembaga Zakat Negeri Kedah (LZKN) bagi meningkatkan pengeluaran hasil sawah.

Bagi merealisasikan projek penanaman lima musim dalam dua tahun, katanya, kerajaan dijangka memerlukan sehingga RM3 bilion untuk menyediakan infrastruktur di kawasan sawah seluruh negara seperti naik taraf jalan, tali air dan saluran secara berperingkat dalam tempoh antara dua hingga tiga tahun.

"Kita nak cari penyelesaian (untuk pesawah), bukan nak bergaduh tunjuk siapa hero? Kita bincang dengan Jabatan Pertanian dan MADA, kalau nak jayakan projek tanaman padi dua tahun lima kali pengeluaran, ke-

na ada infrastruktur jalan, tali air dan pelbagai lagi.

"Saya tanya berapa (kos)? Mula untuk dua, tiga tahun mi paling kurang kena ada RM3 bilion.

"Jumlah itu banyak, tetapi kalau negara ini selamat daripada sakau, curi dan rasuah, kita boleh selesaikan masalah. Saya luluskan RM3 bilion hari ini, kita kena buat untuk tingkatkan produktiviti padi.

"Itu sebabnya saya cakap kena jimat belanja, nak tunggu dapat hasil, kita bagi RM200 sebulan selama tiga bulan kepada 300,000 pesawah sementara dapat tuaian," katanya berucap pada Majlis Sentuhan MADANI Bersama Peladang, Penternak, Nelayan, Penoreh dan Pekebun Kecil, di sini semalam.

Yang turut hadir, Timbalan Perdana Menteri merangkap Menteri Kemajuan Desa dan Wilayah, Datuk Seri Dr Ahmad Zahid Hamidi; Menteri Pertanian dan Keterjaminan Pertanian, Datuk Seri Mohamad Sabu; Ketua Setiausaha Negara, Tan Sri Mohd Zuki Ali serta Pengerusi MADA, Datuk Dr Ismail Salleh.

Inisiatif jamin kehidupan

Sementara menunggu segala infrastruktur terbabit siap dan penanaman padi lima musim dalam dua tahun direalisasikan sepenuhnya, Anwar berkata, nasib pesawah akan terus dibela dengan pelbagai inisiatif bagi menjamin kehidupan mereka.

Perdana Menteri yang juga Menteri Kewangan turut berharap pesawah dapat memberi kerjasama kepada setiap agensi pelaksana di kawasan masing-masing



Anwar menyampaikan bantuan kepada wakil Peladang kawasan MUDA, Aswadi Khairi Che Omar pada Majlis Sentuhan Madani Peringkat Negeri Kedah bersama Pesawah, Nelayan, Penoreh dan Pekebun Kecil di Alor Setar, semalam.

(Foto Syaharim Abidin/BH)

bagi menjayakan usaha ke arah tanaman padi dua tahun lima musim.

Beliau memaklumkan, kerajaan sudah berbincang dengan syarikat Padiberas Nasional Berhad (BERNAS) bagi membantu usaha berkenaan, terutama di kawasan MADA yang mempunyai kawasan tanaman padi seluas 201,000 hektar.

"Saya cakap dengan Syed Mokhtar (Tan Sri Syed Mokhtar Al-Bukhary), untuk pesawah ini, bagi sedikit (peruntukan), tahun lepas dapat RM10 juta, tahun ini dapat RM50 juta, bagi terus kepada pesawah, dia (Syed Mokhtar)

tak susah pun.

"Bila saya nak bantu petani, mereka serang kata saya tekan orang Melayu kaya. Saya tak sakau duit dia, bukan minta masuk akaun sendiri atau parti. Dahulu kenapa (kerajaan terdahulu) tak minta (pada Syed Mokhtar)?

"Kita cari jalan bantu pesawah, ada dasar pertanian sawah padi. Kita tak boleh import semua (beras), ada keperluan 50 ke 60 peratus padi dihasilkan sendiri.

"Kita tak boleh buka kawasan sawah baharu kecuali di Sabah dan Sarawak, oleh itu program dua musim lima tahun kena dilaksanakan," katanya.